

ACE: Assignment Made Easy

Nur Hakimah Md Sallehuddin, Sheela Paramasivam, Alice Shanthi (PM Dr.),

Nur Amirah Nabihah Zainal Abidin, Siti Noor Dina Ahmad,


Tengku Farah Petri Tengku Mahmood & Fatin Aliyah Binti Hassan

Akademi Pengajian Bahasa, UiTM Kampus Seremban

Pada 9 April 2022, bersamaan hari Sabtu, pihak Akademi Pengajian Bahasa (APB) UiTM Cawangan Negeri Sembilan telah menganjurkan satu program pembangunan pelajar yang bertajuk ACE: Assignment Made Easy. Selari dengan trend perkembangan proses pengajaran dan pembelajaran (PnP) yang telah berubah kepada proses PnP secara dalam talian (online), UiTM secara keseluruhan telah melaksanakan PnP secara Online Distance Learning (ODL). Melalui anjakan paradigma ini, ilmu pengetahuan dan kemahiran menggunakan pelbagai aplikasi dalam talian telah menjadi satu keperluan kepada pelajar-pelajar serta para pensyarah dalam mengadaptasi PnP secara ODL.

Bertitik tolak daripada situasi dan keadaan semasa ini, APB UiTMCNS Kampus Seremban telah mengambil inisiatif untuk menganjurkan satu sesi perkongsian dan latihan yang bersesuaian kepada para pelajar bagi meningkatkan pengetahuan dan kemahiran mereka menggunakan beberapa jenis aplikasi dalam talian. Program ini telah memberi pendedahan kepada para pensyarah dan juga pelajar khususnya mengenai tatacara penggunaan aplikasi penyuntingan dan juga laman sesawang yang boleh mereka gunakan bagi tujuan pembelajaran. Empat objektif utama program ini dijalankan adalah untuk:

1. Memberi pendedahan kepada para mahasiswa dalam menggunakan aplikasi penyuntingan untuk digunakan dalam tugas melalui website ACE yang telah direkacipta oleh sekumpulan pensyarah APB Kampus Seremban.
2. Memantapkan dan mengaplikasikan pengetahuan asas dalam perisian multimedia dalam kalangan mahasiswa selaras dengan objektif pendidikan Nasional IR 4.0 dan IR 5.0.
3. Melahirkan lebih ramai mahasiswa yang mahir dalam penggunaan perisian penyuntingan.
4. Melahirkan graduan yang mempunyai kemahiran insaniah yang tinggi dan dapat berkolaborasi dalam pasukan untuk pembelajaran dalam talian (ODL).



Bagi program ini, pihak APB telah mensasarkan para pelajar yang telah mendaftar subjek ELC bagi semester Mac - Julai 2022 di UiTMCNS Kampus Seremban. Seramai 314 orang peserta yang terdiri daripada para pensyarah serta pelajar dari UiTMCNS telah hadir. Turut hadir bersama dalam program ini adalah Penolong Rektor UiTMCNS, Dr. Suhaimi Bin Hj. Abd. Samad dan Timbalan Rektor Hal Ehwal Akademik UiTMCNS, Dr. Noorlis Binti Ahmad.

Program ini juga telah mendapat sambutan yang amat baik dengan kehadiran peserta yang melebihi jumlah sasaran pelajar yang dianggarkan. Selain itu, kehadiran pimpinan tertinggi UiTMCNS juga telah memberi impak positif melalui sokongan yang diberikan kepada pihak APB UiTMCNS Kampus Seremban khususnya dalam pengajuran program seperti ini. Pihak APB UiTMCNS Kampus Seremban juga akan terus komited dan berusaha dalam memberi perkhidmatan terbaik dengan menawarkan pelbagai bentuk latihan serta perkongsian ilmu pengetahuan melalui program-program menarik pada masa akan datang.

